

OKRUŽNI PRIVREDNI SUD U BANJOJ LUCI

Broj: 57 0 St 108579 14 St

Banja Luka, 18.7.2017. godine

Okružni privredni sud u Banjoj Luci, stečajni sudija Nedeljko Milijević, u stečajnom postupku nad stečajnim dužnikom: "MBD COMPANY" d.o.o. za trgovinu i usluge Banja Luka, Jevrejska b.b., lamela 1, lokal broj 4, van ročišta, 18.7.2017. godine, donio je sljedeće

R J E Š E N J E

- I. **ZAKLJUČUJE SE** stečajni postupak nad stečajnim dužnikom: "MBD COMPANY" d.o.o. za trgovinu i usluge Banja Luka, Jevrejska b.b., lamela 1, lokal broj 4.
- II. Ovo rješenje s razlozima zaključenja stečajnog postupka objavit će se u „Službenom glasniku Republike Srpske“.
- III. Nalaže se sudskom registru da na osnovu pravosnažnog rješenja izvrši brisanje stečajnog dužnika iz registra poslovnih subjekata.

O b r a z l o ž e n j e

Rješenjem Okružnog privrednog suda u Banjoj Luci, broj: 57 0 St 108579 14 St, od 01.10.2014. godine, otvoren je stečajni postupak nad stečajnim dužnikom: "MBD COMPANY" d.o.o. za trgovinu i usluge Banja Luka, Jevrejska b.b., lamela 1, lokal broj 4. Istim rješenjem za stečajnog upravnika imenovan je Radoslav Zagorac iz Banje Luke.

U toku postupka ispitane su prispjele prijave potraživanja povjerilaca. Ukupno prijavljena potraživanja povjerilaca iznose 778.022,73 KM. Priznata potraživanja iznose 639.422,45 KM od čega se iznos od 235.662,53 KM odnosi na razlučnog povjerioca, dok je iznos od 5.806,18 KM svrstan u viši isplatni red a iznos od 397.953,74 KM svrstan u opšti isplatni red. Osporena potraživanja iznose 138.600,28 KM.

U izuještaju, i na ročištu, stečajni upravnik je istakao da stečajni dužnik od imovine raspolaže stan koji se nalazi u Banjoj Luci čija procijenjena vrijednost iznosi cca 150.000,00 KM. Isti je upisan u Knjigu etažnih vlasnika i na istom je upisana hipoteka MF bank a.d. Banja Luka. Nadalje je istakao da on nema namjeru da unovčava imovinu na kojoj postoji razlučno pravo, te da prepušta povjeriocu MF bank Banja Luka da istu unovčava i svoje potraživanje naplaćuje odvojeno u izvršnom postupku. Takođe, stečajni dužnik raspolaže osnovna sredstva u vrijednosti cca 1.750,00 KM. Što se tiče osnovnih sredstava misli da je iste teško unovčiti, a nema novčanih sredstava za objavu oglasa za prodaju istih.

Nadalje stečajni upravnik je istakao da stvoreni troškovi stečajnog postupka iznose 10.000,00 KM, te ukoliko uspije unovčiti osnovna sredstva troškovi će biti namireni u manjem dijelu. Kako stečajni dužnik ne raspolaže imovinom iz koje se mogu namiriti potraživanja povjerilaca i troškovi stečajnog postupka predložio je da se stečajni postupak zaključi zbog nedostatka sredstava za daljnje vođenje stečajnog postupka u smislu člana 137. Zakona o stečajnom postupku, a ukoliko povjerioci imaju interesa da se nastavi stečajni postupak potrebno je da obezbjede i uplate troškove stečajnog postupka u najmanjem iznosu od 20.000,00 KM. U nastavku stečajnog postupka stečajni upravnik bi pobijao pravne radnje stečajnog dužnika vezane za otuđenje pokretnih stvari na kojima postoji založno pravo MF banke. Pokretne stvari se ne nalaze u stečajnoj masi i iste je, po njegovom mišljenju, stečajni dužnik otuđio prije pokretanja stečajnog postupka što je protuzakonito.

Povjerioci su predložili da sud naloži povjeriocima da uplate predujam troškova stečajnog postupka s razmjeno njihovim potraživanjima, pa ukoliko povjerioci uplate predujam troškova stečajnog postupka da stečajni upravnik podnese tužbu radi pobijanja pravnih radnji stečajnog dužnika vraćanjem stvari u stečajnu masu, a ukoliko povjerioci ne uplate predujam troškova stečajnog postupka da sud zaključi stečajni postupak.

Na ročištu, održanom 11.03.2015. godine, sud je donio rješenje kojim je naloženo povjeriocima da uplate predujam troškova stečajnog postupka u iznosu od 20.000,00 KM na depozitni račun suda u roku od 15 dana, te u istom roku sudu dostave dokaz o uplati. Istim rješenjem sud je upozorio povjerioce da ukoliko jedan od povjerilaca uplati predujam troškova stečajnog postupka, a drugi povjerioci ne uplate svoj dio troškova, povjeriocu koji je uplatio svoj dio troškova naložit će se da doplati predujam troškova stečajnog postupka sve do iznosa od 20.000,00 KM. Takođe, povjerioci su upozoreni da ukoliko ne uplate predujam troškova stečajnog postupka i o tome ne obavijaste sud smatrat će se da nemaju interesa za daljnje vođenje stečajnog postupka, pa će sud stečajni postupak zaključiti temeljem člana 137. Zakona o stečajnom postupku.

Podneskom od 03.04.2015. godine povjerilac „Peran Security Systems“ d.o.o. Sarajevo, po punomoćniku Selimović Almiru, advokatu iz Sarajevo, dostavio je sudu dokaz da je povjerilac izvršio uplatu predujma troškova stečajnog postupka u iznosu od 150,00 KM.

Ostali povjerioci nisu postupili po rješenju suda i uplati predujam troškova stečajnog postupka.

Kako je povjerilac „Peran Security Systems“ d.o.o. Sarajevo uplatio svoj dio troškova, dok drugi povjerioci nisu uplatili predujam troškova stečajnog postupka, to je sud istom naložio da u roku od 15 dana uplati preostali dio troškova tj. 19.850,00 KM sa upozorenjem da ukoliko povjerilac „Peran Security Systems“ d.o.o. Sarajevo ne uplati navedeni iznos smatrat će se da nema interesa za daljnje vođenje stečajnog postupka pa će sud stečajni postupak zaključiti temeljem člana 137. Zakona o stečajnom postupku.

Ovaj povjerilac nije predujmio preostali dio troškova stečajnog postupka pa sud nije bio u mogućnosti da izmiri dospjele troškove stečajnog postupka, niti da dalje voditi stečajni postupak i isti je sud morao zaključiti.

Nakon iznesenog, a na osnovu člana 137. stav 1. Zakona o stečajnom postupku, odlučeno je kao u izreci rješenja.

STEČAJNI SUDIJA
Nedeljko Milijević



PRAVNA POUKA: Protiv ovog rješenja dozvoljena je žalba Višem privrednom sudu u Banja Luci u roku 8 dana po prijemu istog, putem ovog suda.